

Dithero tsa Tirelano mo Kutlwanong

43/2013 Thero ka Sontaga wa 13 morago ga moletlo wa Borarobongwe, e le ka 25. 08. 2013

MO LEINENG LA MODIMO O E LENG RARA LE MORWA LE MOWA O O BOITSHEPO!

1. Sefela sa 299 - 274/280
2. **Thapelo:** Modimo Rara, re lebogela Lefoko la gago le le re rutang ka ga bopelotlhomogi, le ka ga bopelonomi jwa gago. O re thuse, o re sedimosetse ka lona, o re fe dipelo tse di nang le lorato lwa go ratana, re amogelane ka bopelotlhomogi, re direlane ka dikabelano, mme re se ka ra iikanya, mme re ikanye bopelotlhomogi jwa gago, re gogiwe ke jona ka ntlha ya ga Jesu Keresete, Morena, Morepholosi. Amen.
3. Epistolo ka fa thulaganyong ya 2 e kwadilwe mo go 1 Johane 4:7-12
Efangele ka fa thulaganyong ya 1 e kwadilwe mo go Luka 10:25-37
4. A go ipolelwe tumelo ya bokeresete!
5. Sefela sa 29 - 27/26
6. Thapelo ya mmadi wa thero.
7. **Efangele** ka fa thulaganyong ya 5 e kwadilwe mo go Matheo 6:1-4, e re: Jesu a re: "Itiseng gore lo se dire tshiamo ya lona fa pele ga batho gore lo bonwe ke bone; go seng jalo ga lo na tuelo mo go Rraeno yo o kwa magodimong. Ka moo he, e re fa o dira tsa bopelotlhomogi, o se ka wa letsa lonaka fa pele ga gago, jaaka baitimokanyi ba tle ba dire mo disenagogeng le mo mebileng gore ba tlotlwe ke batho. Ammaaruri ke lo raya ke re: Tuelo ya bone ba setse ba e amogetse. Mme wena e re fa o ntsha dikatso, a letsogo la gago la molema le se ka la itse se se dirwang ke le le jang, gore dikatso tsa gago di nne mo bosaitsiweng; mme Rrago yo o bonang mo go fitlhegileng o tla go duela." Amen.

8. Thero: Barategi mo Moreneng wa rona Jesu Keresete, Morena wa rona Jesu o re ruta ka dikabelo tsa rona tse re di abelang gore re itse, fa re tshwanetse go di dirisa jang, re be re di abele ba bangwe jang. O rata thata gore re abelane, mme go abelana ga rona ke go abela ga rona go tsamaye, go dirafale ka fa tseleng ya gagwe ka fa go laotsweng ke ene ka teng, gonne fa re abela re direla ene, ga re direle mohumanegi, gongwe bahumanegi. Ga re direle batsadi ba rona, gongwe bana ba rona ba ba tlaletsweng. Ga re direle phuthego gore re ipontshe mo go yona, re bonwe ke yona, re lebogwe ke yona fela. Mme go na le Lefoko lengwe le le reng: "Yo o tlhomogelang yo mmotlana pelo o adima MORENA; ene o tla mo duelela thuso ya gagwe." Ke gona re direlang Morena ka tsa gagwe tse ene a di re neileng gore re di didirise ka boikanyego ka fa thatong le ka fa tseleng ya gagwe. Re tshwanetse go ithuta le go gopola gore dineo tsa rona tse re di abelang, le ditiro tsa rona ga se tsa letlhogonolo la rona, le re tshwanetseng go nna bopelotshetlha ka lona, gongwe re ititaya sefuba ka tsona, re tle re ikgodise thata ka tsona, re tle re itlote ka tsona, re tle re tlotliwe mo ponatshegong le mo mafelong a a kgakala, re re: Re tlhalefile rona, re tlhoafetse thata, re re : Re na le letlhogonolo ka ba ba sa tlholeng ba se yo. Re thusitswe ke ba pele. Ke boswa jwa rona. Ga se tshwanelo gore re pateletse ka tsona, le e seng go thusa ka tsona. Nyaya, a go se nne jalo!

Lefoko la Morena le a re ruta, le a re gopotsa gore "neo nngwe le nngwe e e molemo le mpo nngwe le nngwe e e tletseng e tswa kwa godimo, e fologa kwa go Rra-masedi yo go se nang phetogo epe mo go ene, le e seng kamogano ya bosigo le motshegare." Efangele ya kajeno e rata go re tlhagisetse gore re se tsene mo kotsing eo ya go ikgalaletsa, ka go duma kgakala, ka go dira mo ponatshegong, re tle re bone ke batho.

Jesu o kaela badumedi gore

1. ba se ka ba letsa lonaka fa pele ga bone, fa ba ntsha dikatso;

2. Ba se ka ba supetsa letsogo la molema, fa ba ntsha dikatso ka le le jang.

1. Morena Jesu o kaela badumedi gore **ba se ka ba letsa lonaka fa pele go bone, fa ba ntsha dikatso.** Ke gore Morena o a kaela gore o ka re fa go na le yo re mo abelang katso re rate gore go itsege gore ene o filwe ke rona, o ka re: Ke nna ka nosi, go itsiwe ke lefatshe lotlhe gore ke nna yo ke mo tsweledisang mo tirong ya gagwe, jaaka ke mmona. Fa e le yo o ntseng jalo. Tseo di bosula. Ga di amogelesege. Ke re: E

ka nna, le fa kabelo e e kanakang. Ke sona se Morena a kaelang, a rutang ka ga sona a se bitsa gore ke go letsa lonaka fa pele ga gago. A lefufa ka losi le kgaogane le motho yo o sa itumeleleng, fa a bona yo mongwe a amogela neo e ntle, o ka re: Ke ene yo o tsamayng kwa pele, le kwa godimo, jaaka ba dira ba lalediwa ka letsatsi mo tshimong ya moweine, ba ngongoregela morena wa tshimo ya moweine ka ntlha ya go ka duela, jaaka a duetse ba ba dirileng ura e le nngwe fela. Morena wa tshimo ya moweine o ne a re: Leitlho la bone le bosula. A re: Ke tsela ya Bafarisai le baitimokanyo ba ba ratang go bonwa le go lebogwa ke batho. Ee, teng foo ba setse ba amogetse tuelo ya bone, jaaka kgogo e e tsetseng leé e lela, e re: "Ke-ke-ke-ke, ke-ke-ke-ke! Ke setse ke dirile. Ke setse ke berekile!" A mokoko le batho ba utlwe, le dintšwa di utlwe gore e setse e dirile. Go felelela foo, gonne go setse go itsilwe ke botlhe. Ke re: E dira tsa yona tota. Dikgogwana ga di ka ke di nna teng. Ka lebaka la eng? Gonne go itsiwe ke botlhe kwa maé a leng teng. Kana e e didimalang e a bonala, fa e tsamaya le dikgogwana tsa yona. E tla lebogwa tota ke mong wa yona. Morena o batla tsela e e ntseng jalo gore re lebogwe ke ene yo e leng Mong-wa-rona, yo e leng Mong-wa-dineo-tsa-rona. "Ammaaruri ke lo raya ke re: Tuelo ya bone ba setse ba e amogetse." A re tsamayeng mo tseleng ya Morena gore re se ka ra amogela tuelo ya rona kwa go sa tshwanelang teng!

2. Jesu o kaela badumedi **gore ba se ka ba supetsa letsogo la molemo, fa ba ntsha dikatso ka le le jang.** Morena a re: "Mme wena, e re fa o ntsha dikatso, a letsogo la gago la molema le se ka la itse se se dirwang ke le le jang gore dikatso tsa gago di nne mo bosaitsiweng." Ke gore mongwe-ka-wena a se ka a itse, fa wena o abela yo mongwe kabelo e e rileng. Letsogo la gago la molema le raya motho yo mongwe, le raya wena o le wesi, le raya go ikgalaletsa, le raya go itimokanya, le raya go solofela tuelo ka tiro eo o tswang go e dira, le go lebelela tuelo. Mme ke tshwanelo gore re dire jaaka bale ba ba abetseng bahumanegi le ba ba tshwerweng ke tlala, le ba ba diretseng ka go lekola balwetse le ba ba golegilweng, ba ba direla bopelotlhomogi le tshwanelo ya bone, ba sa lebelele sepe, ba naya Modimo tlotlo ya ona, ba o galeletsa, ba gakgamala fela, fa ba ne ba utlwa ga twe: "Tlaang lona, batshegofadiwa ba ga Rre, lo rue boswa jwa puso e lo e baakanyeditsweng e sa le ka tlholego ya lefatshe!" Ba gakgamala, gonne ba ne ba sa itse, ba ne ba sa lebelele sepe, ba dira fela tse ba neng ba tshwanetse go di dira. Le mo go rona Morena o batla tseo gore re se itse sepe ka ga ditiro tsa rona, re se lebelele, re se solofele tuelo le moputso, le fa di le teng tse di

kanakang, fela ka metlha re ipolele, re re: "Re batlhanka ba re se nang molemo, re dirile fela se re neng re tshwanetse go se dira." Mme fela a re itumeleng, boitumelo jwa rona bo nne teng ka ntlha ya gore maina a rona a kwadilwe mo lokwalong lwa botshelo. Re itumelele kitso ya gore re biditswe ke Morena Jesu, re laleditswe ke ene gore re nne le kabelano mmogo le ene, re be re kopane le ene mo selalelong se se boitshepo sa gagwe, re bone boitshwarelo jwa maleo a rona. A re yeng mo go tsona tse re tshwanetseng go di tlhokomela, le go di lebelela, le go di tloafalela pele. Ke raya boitshwarelo jwa maleo le maungo otlhe a jona! A re itumeleleng tsona, re itumelele tsona, re di itumelele tota, re nne le sebete, gonne kwa boitshwarelo jwa maleo a leng teng, go na le botshelo le pholoso le kgalalelo e e sa khutleng, le tsotlhe tse di siameng tse re di baakanyeditsweng ke Jesu Morepholosi.

Ka tseo go tthaloganngwa ka pele gore ke tshwanelo gore re farologanye fa gare ga tse di tshwanetseng go dirwa mo sephiring, le mo ponatshegong. Ka Lefoko la thero ya kajeno re utlwile ka ga tse di tshwanetseng go dirwa mo sephiring, mme tseo tse di umakilweng mo bofelong ke ditiro tse di molemo tse di tshwanetseng gore batho ba di bone, ba galaletse Rraetsho yo o mo legodimong ka tsona, ke raya thero ya Efangele ya boitshwarelo jwa dibe mo leineng la Jesu, le disakaramente di tshwanetse go abelwa mo ponatshegong, gore batho botlhe ba utlwe gore ba lalediwa go kolobediwa, le go boela mo kolobetsong ka malatsi otlhe gore Atame yo mogologolo a nwediwe, badumedi ba lalediwa gore ba atamele mo boipobolong le mo selalelong sa Morena go bona boitshwarelo jwa maleo a bone, ba amogele mmele wa ga Keresete, le madi a gagwe a ba a tshologeletsweng go nna boitshwarelo jwa dibe. Dineo tseo di se lobiwe, mme di abelwe mo ponatshegong. Amen.

9. Thapelo: Morena, Rara wa rona yo o re ratang, re lebogela Lefoko le lentle la gago le le re rutang gore re se ka ra lebelela tse re ka di iponelang, le tse re ka di ipaakanyetsang ka borona, mme re lebelele bopelotlhomogi jwa gago jo bo mo go Jesu Keresete, re solofele mo go jona fela. O re thuse mo go tsona ka Mowa o o Boitshepo wa gago, Rara yo o rategang wa lebgodimo ka ntlha ya ga Jesu Keresete, Morena, Morepholosi. Amen.

Thapelo ya Morena: Rara wa rona yo o mo legodimong ...

10. Sefela sa 256 - 238/248

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke A. N. Ntuli (†), ka ngwaga wa 1995/2001.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.